

## Ina dumengia plein tensiun

Gia baul la damaun han ils svegliarins dallas giuvnas da Mustér scalinau la dumengia vargada. Entuorn las sis ein ellas semessas sin via enviers Wängi ella Turgovia. Cuort avon han ils Bulls intervegnu che in da ses trenaders seigi absents. Aschia ein ils Bulls serimnai en garderoba per tedlar las devisas da *Noah Giger* e *Livio Cajochen* che han accumpignau nus quei di.

### 0:2 encunter Appenzell

Plein motivaziun e cun in bien spért da team han ellas entschiet lur emprem giug encunter l'equipa digl Appenzell. Gia naven dall'entschatta han ellas fatg squetsch e mussau cun bialas cumbinaziuns ch'era ellas san vegnir culla balla sil gol adversari. Oravontut entras entginas paradas nuncapeivlas da *Mila Dermont* han las Appenzellesas nuota giu ton da rir avon nossas petgas. Aschia ei l'emprema mesadad vargada cul resultat equilibrau da 0:0.

Suenter pausa han ils Bulls empruau da crear entginas bunas acziuns e vegnir pli curaschusas. Deplorablamein ha Appenzell aunc inaga smacchau anavon la balla e sinaquei ei igl emprem gol reussius ad ellas. Suenter entgins siets da discletg dalla vart dils Bulls ha ei cuort silsuenter schulau ed aschia ei igl emprem giug ius a fin cun in 2:0 per Appenzell.

### 1:4 encunter Laupen

Duront la pausa han las giuvnas aunc inaga rimnau tut lur forzas e quei cun bien duer, pertgei las adversarias eran il capogruppa, Laupen. Aschia la strategia dils Bulls: star plitost davos, tener ferm la defensiun e tenor schanza schar ir la balla anavon per nezegiar siets ella reit adversaria. Las Turitgesas ein gia stadas naven dallas empremas secundas malemperneivlas. Cun ina buna tecnica savevan ellas dar cuorts e sperts pass, in sforz per nossas giuvnas da buca schar rumper ellas atras lur mir. Quella situaziun han ellas denton ditg dau damogn fantastic ed aschia ein ils Bulls ir ella pausa culla sperdita da sulet in gol.

La secunda mesadad ei buca stada meins stuffia per nossas giuvnas. Ei deva singulas acziuns nua ch'ins vegneva anavon culla balla, ils siets ein denton vegni parai dil goli da Laupen. Era ils golis *Ursina Venzin* e *Marina Bearth* han denton fascinau cun capoovras ed aschia salvau l'equipa dad entginas attaccas directas. Cul temps han las Turitgesas denton buca schau ceder ed aschia ein las empremas ballas setschentadas ella reit dils Bulls. Il giug ei sinaquei daventaus in bien toc pli grobs e quei dad omisduas varts. Ella davosa mesa minuta ei denton reussiu sin in assist d'*Aurelia Giger* in bellezza e beinmeritau gol da *Gada Cathomas*. Aschia ein las giuvnas idas giu da plaz suenter in intensiv giug cul resultat da 4:1 per las adversarias da Laupen.

Las giuvnas da Mustér han quella dumengia demussau giugs plein tensiun e ch'ei dat in punct central tier da quels campionadis: star en ina per l'autra e mai dar si.

Desertina Bulls: Livio Cajochen, Alexandra Flepp, Aurelia Giger, Ramona Venzin, Anna Quinter, Tamara Derungs, Milena Derungs, Jana Caduff, Gada Cathomas, Selina Giger, Chanel Monn, Marina Bearth, Mila Demont, Anica Seiler, Jana Venzin, Ramona Simonet, Noemi Zanin, Fabiana Bearth, Aline Cajacob, Ursina Venzin, Noah Giger.

Per ils Desertina Bulls

Marina Bearth